



Oltaem yumi mas lukaotgud taem we yumi stap lukluk olbaot long intanet – sipos no, mestem yu klik long wan ples we i gat sam rabis muvi long hem o i gat hemia we oli stap kilim nogud olgeta.

Sipos mi luk sam rabis muvi long intanet, bambae mi mekem wanem?

Maet yu mestem nomo yu prestem wan link we i tekem yu yu go long wan ples long intanet we yu luk sam samting we yu sem long hem o yu fraet blong lukluk long hem. O maet ol fren blong yu oli talem se yu traem lukaotem sam pija we oli soem rabis fasin wetem ol tabu pat blong bodi blong ol pipol. O maet yu wantem faenemaot moa samting long saed blong olsem wanem bodi blong yu i stap jenis, o yu wantem save moa long olsem wanem ol man mo ol woman oli save gat rilesensip.

Be hem i klia se taem we i gat tumas toktok o infomesen long saed blong seks, wetem ol rabis muvi, i save nogud long tingting blong yu o long tingting blong ol fren blong yu. Maet oli save mekem ol kaen samting olsem:

1. oli save mekem se yu gat samfala rong tingting long saed blong seks mo long saed blong go klosap long wan narafala man blong gat wan rilesensip wetem, mekem se i had long yu blong yu save gat wan gudfala rilesensip we i gat rispek long hem.
2. oli save soem ol man mo ol woman long samfala defren o giaman wei we oli no fit wetem kaen laef we yumi evriwan i stap long hem.
3. oli save promotem vaelens mo fasin blong kilim woman, olsem se hem i wan samting we i oraet nomo, be hemia i neva stret.

Sipos yu wantem karem ol infomesen we i ril, i tru, mo i stret long grup we i sem ej wetem yu, i gud yu askem long wan bigfala man o woman o wan fren blong yu we yu save trastem.

Wan samting we i tabu tumas, hem i taem we oli putum sam foto o muvi long intanet we i soem malmal blong ol pikinini long wan wei we i nogud o we maet samfala pipol i gat rabis tingting long hem. Sipos yu luk wan samting olsem, yu mas mekem wan ripot long hem i go long polis.

Sipos mi luk sam samting long intanet we i soem ol pipol oli stap kilim nogud ol narafala, bae mi mas mekem wanem?

I gat samfala grup mo samfala pipol we oli laekem tumas blong serem ol nogud samting long intanet, olsem maet hem i ol rabis muvi, o maet hem i muvi o foto blong wan aksiden o wan situesen we sam pipol oli karem ol rabis kil long bodi blong olgeta long hem. Maet yu luk wan pija o wan muvi we i nogud gogo yu sek nogud long hem mo yu fraet. Maet man we i postem samting ya i ting se i oraet, be hemia i nating, from we ol kaen pija ya oli save spolem nogud tingting blong ol narafala pipol mo mekem yu tu yu harem nogud.

Yu mas tekem aksien, mo yu mas kontrolemgud wanem we yu stap lukluk long hem long intanet

I gud blong tingbaot se yu nao yu gat raet blong yu nomo yu jusum wanem we yu wantem luk long intanet mo wanem we yu no wantem luk long hem. Yu save kontrolem wanem we i kamaot long skrin blong yu olsemia:

1. Go lukluk long ol websaet nomo we yu savegud finis se yu save trastem.
2. Joenem nomo ol grup long intanet we oli stap soem ol storian we oli positiv mo ol pija we oli sef.
3. Ripotem ol pija mo ol storian we oli mekem yu sek, yu fraet, o yu harem nogud long hem. Blong kasem moa infomesen long olsem wanem blong mekem ripot long ol pija wetem ol vidio long Fesbuk, yu save go long Ples blong [Kasem Sapot](#). Maet yu intres tu blong ridim sam rul long saed blong wanem we olgeta blong Fesbuk oli alaoem mo wanem we oli no alaoem, olsem ol [Stret Standad](#) blong folem long Fesbuk.
4. Ol pija mo ol storian we oli no stret folem loa, yu mas ripotem i go long oll polis.
5. Toktok long ol bigfala man o woman we yu trastem olgeta, wetem ol narafala man we yu save, blong oli save givim moa infomesen, advaes mo sapot long yu.

